

(5) Viro Clarissimo
 D. D. M. Th. Brunnichio
 s. pl. d.
 Car. v. Linne

Summo gaudio Tuæ, d. 5. Februarii, me affecere, quas accepi heri, postquam Tuas anxie desideravi, quasque non vidi ab eo, quo Londini commoratus es tempore; maxime doleo Tuas posteriores amissas, cum e Tuis semper doctior evasi, cumque hæ pluribus semper refertæ sunt solidis observationibus, quam ullius alii. Nihil mihi gratius contingeret quam Te in hac vita coram videre; utinam posses, quum petas meam patriam, quanto ocius, dum vixero, accedere, quum anni mei percurrunt velociter ad metam; possem tum Tuis oculis videre multa, quæ observasti in felicissimis Tuis per florentissimas Europæ regiones, quæ mihi denegarunt fata. Gratulor ex animo tam splendidum Tibi iter; faxit Deus ut feliciter hoc absolvas. Mihi dictum fuit, nescio a quo, quod sis designatus Professor Hafniensis, quod si factum, in nulum potuisset S. Regis Tui gratia conferri aptiorem, vigilantio-rem, acutiorem.

Admiratione summa raptus fui ad Muscas istas in montibus Danubianis quæ occidunt boves; dum resciveris, quæso me participem facias hujus mirandi phænomeni.

Quis umquam credidisset Papil. Leucothoen, vere Indicum, migrasse ad Europæos et ibi sedem fixisse, nisi Tu hoc observasses, docuisses. Est omnino una eademque species.

Scopoli Mineralogia, quam diu anxie quæsivi, obtinui, sed minuebat præsentia famam.

Ichthyologiam Massiliensem Tuam avidissime omnium optarem videre. Si umquam occasio ulla sese offerat, quæso millies me ea bearis. Audio et Gouani Ichthyologiam sudare; sic brevi classis Piscium Europæorum plena luce radiabit et demum exoticorum, dum naturæ consueti his stimulentur ad attentionem.